

## Roho Mtakatifu Maishani

**N**ami nitamwomba Baba, naye atawapa msaidizi mwingine, ili akae nanyi hata milele.—**Yohana 14:16.**

Kuna roho zenye njaa kwa ajili ya mkate wa uzima, zenye kuonea kiu maji ya wokovu; na ole kwa mtu yule ambaye kwa kalamu au sauti atawageuza kuzielekea njia za uongo! Roho wa Mungu anawasihi wanadamu, akiwasilisha mbele yao majukumu mema ili kumpenda na kumtumikia Yeye kwa moyo, kwa uwezo, akili na nguvu, na kuwapenda jirani zao kama nafsi zao. Roho Mtakatifu anagusa utu wa ndani mpaka unapotambua nguvu takatifu ya Mungu, na kila uwezo mtakatifu unaimarisha katika utendaji madhubuti...

Kazi ya kina, na kamilifu inapaswa kufanywa katika roho, ambapo ulimwengu hauwezi kuona. Wale ambao hawajui inamaanisha nini kuwa na uzoefu katika mambo ya Mungu, ambao ... hawashuhudiwi na Roho kwamba wamekubaliwa na Yesu Kristo, wanahitaji kuzaliwa mara ya pili.... Je! Ulimwengu unaweza kujua nini kuhusu uzoefu wa Kikristo? Kwa kweli hakuna. "Msipoula mwili Wake Mwana wa Adamu na kuinywa damu Yake, hamna Uzima ndani yenu." Mwalimu Mkuu alifafanua agizo hili kwa kusema, "Roho ndiyo itiayo Uzima, mwili haufai kitu; maneno hayo niliyowaambia ni roho, tena ni uzima."

Katika zama hizi, Neno la Mungu halichukuliwi kuwa la kutegemewa. Neno la Kristo, ambalo hukata moja kwa moja tamaa na anasa za kibinadamu, na kushutumu tabia na desturi zinazopendwa na watu wengi—Neno aliyefanyika mwili na kukaa kati yetu—hupuuzwa na kudharauliwa. Mafundisho na miifano ya Yesu havifanywi kuwa kigezo cha maisha ya mtu anayedai kuwa mfuasi wa Kristo. Wengi walitajao jina la Yesu wanatembea katika nuru ya cheche za moto waliowasha wao wenyewe, badala ya kutembea kwa kufuata nyayo za Bwana wanayemkiri. Hawawasilishi tabia ile ile ambayo Yesu aliiwasilisha katika upendo Wake safi na wa kweli kwa Mungu, na katika upendo Wake kwa wanadamu walioanguka. Hawamwamini Mungu kama ipasavyo katika neno Lake, na kuhusianisha mapenzi yao na ya Yesu Kristo. Hawaundi tabia ya kuongea na Yesu, juu ya kumfanya Yeye kuwa kiongozi na mshauri, na hivyo kujifunza kazi ya uzima ya maisha ya Kikristo yaliyo bayana.

Wale ambao hawasikii tu bali wanayaishi maneno ya Yesu wanadhihirisha katika tabia utendaji wa Roho Mtakatifu. Matokeo ya utendaji kazi wa ndani wa Roho Mtakatifu unaoneshwa katika mwenendo wa nje. Maisha ya Mkristo yamefichwa pamoja na Yesu ndani ya Mungu, na Mungu anawatambua walio Wake kwa kusema, "Ninyi ni mashahidi Wangu." Wanakiri kwamba nguvu ya Mungu inahamasisha mioyo yao na kurekebisha tabia zao. Matendo yao yanatoa ushahidi kwamba Roho anaongoza ule utu wa ndani; na wale wanaohusiana nao wanashawishika kwamba wanamfanya Yesu Kristo kuwa kielelezo chao (The Review and Herald, Mei 12, 1896)